

Die ziehn dess dorsch

Habderr gelese?, hott de Schorsch omm Stommdisch gefroocht, dass jetz in Wicker unn drummerum nooch Wasser gesucht werrd? Habder gelese, dass die oogefonge hawwe mett so Maschine so long ze rüttele bis se Thermalwasser gefunne hawwe? Unn wenn se dess Wasser gefunne hawwe dasse draus elektrische Strom mache wolle?

De Karl hott mettem Kopp gewackelt. Ich habbs gelese. Ob dess was werrd?

Ich saach: Onn onnern Stelle in Deitschlond hott merr dess schunn gemacht, doo hotts geklappt. Awwer warum grad in Wicker?

Moont de Schorsch: Die wernn dess dessweeche mache, weil in Wicker im Gerd Mehler soim Energiepark schunn enn Haufe Strom gemacht werrd unn weils in Wissbade heiße Quelle gibt, unn wens in Wissbade Haaßwasser gibt kennt merr sich vorstelle, dass merrs aach in Wicker finne dut, so weit iss dess joo nitt vom Kochbrunne eweck.

Frächt de Karl: Was moone die wie dief die nooch dem Wasser bohren misse?

De Schorsch hotts genau gewusst: Die bohren so bis dreidtausend Meter dief unn nitt nor oo Loch, naa, zwaa Löcher wernn später gebohrt, aus dem oone kimmts haaße Wasser eraus, unn wens aach nor wie im Kochbrunne nit mehr als sechzich Grad heiß iss werrds in e Hall gebummt, dort mett irchend so emm Zeich gemischt dasses unner hundert Grad schunn Dompf gibt ...

Ich habb gegrinst: Du moonst Domp!

Ja, sächt de Schorsch, Domp, unn der Domp treibt e Turbin unn hinner der Turbin iss enn große Dynamo unn der mächt de Strom, awwer doodenooch iss de Domp kalt, werrd widder Wasser unn dess werrd in die Erd zurick gedrickt, drei Kilometer enunner.

De Karl hott gesaat: Also wennse werklich Warmwasser finne gehts rund in Wicker. Weil in Wiesbade mett dem Haaßwasser dess Thermalbad bedriwwe werrd, hott mir ooner zugeflistert, dass de Mehler unn die Wickerer schunn iwwerleeche dun, mett dem haaße Wickerer Wasser genau so e Thermalbad ze baue.

De Schorsch unn ich, mir hawwe gestaunt, unn de Schorsch hott gesaat: Ei guck emol doo. Awwer dess iss doch e mords Idee unn merr kennt sichs vorstelle: E Thermalbad so zwische Wicker unn Hochem, vor de Flerscherer Schweiz mettem Blick uff die Wart.

De Karl war nitt so begeistert von dere Idee. Dess mett dem Thermalbad hätt awwer enn große Noochdeil ferr uns Flerscherer.

Ei was fern Noochdeil?, habb ich gefroocht.

De Karl hadden gonz rote Kopp. Die wolle dann Wicker umdaafe!

Umdaafe?, hott de Schorsch gefroocht, umdaafe? Unn wie solls haaße?

De Karl druff: Wicker soll dann haaße: Bad Wicker.

Mir hawwe uns oogeguckt, de Schorsch unn ich, unn ess hott enn Aacheblick gedauert, bis ich so gonz vorsichdisch de Karl gefroocht habb: Awwer was sollen dess fern Noochdeil ferr Flerschem hawwe?

Ei, schnauft de Karl gonz traurich, ei darum. Weil Flerschem hinnerher haaße det: Bad Wicker, Ortsteil Flörsheim.

Den Schorsch hotts geschittelt. Naa, nur sowas nitt! Um Gotteswille, Karl, dess derrf nie bassiern. Dann wärs besser, die dete drowwe in Wicker koo Warmwasser finne.

Sächt de Karl: Dess mächt nix aus. Weil wenn sich de Mehler unn die Wickerer was vorgenumme hawwe ziehn die dess dorsch, die baue e Thermalbad unn wens mett Kaltwasser iss.

Eiern Honnes.